

11/03/1997

Kampus UPM Sabah dibuka tahun depan

KAMPUS cawangan Universiti Pertanian Malaysia (UPM) di Bintulu, Sabah yang ditutup empat tahun lalu akan dibuka semula awal tahun depan bagi menampung permintaan kemasukan pelajar ke institusi pengajian tinggi (IPT) tempatan.

Naib Canselornya, Prof Datuk Dr Syed Jalaluddin Syed Salim, berkata pihaknya sudah mengemukakan kertas cadangan mengenai hasrat UPM untuk membuka kampus cawangan itu kepada pihak kerajaan, terutama Kementerian Pendidikan.

Menurutnya, UPM akan memulakan operasinya secepat mungkin dan pengambilan pelajar ke kampus itu akan dibuat Mei tahun depan.

"Kita berharap ia akan mendapat perhatian dan kelulusan secepat mungkin daripada kerajaan memandangkan permintaan terhadap pendidikan tinggi pada masa ini begitu tinggi, lebih-lebih lagi ia memberi kemudahan kepada pelajar di Sabah dan Sarawak.

"Lagi pun pihak UPM sendiri sudah begitu banyak melabur bagi membangunkan kampus itu sebelum ini. Saya ingat kita sudah belanjakan kira-kira RM200 juta," katanya ketika ditemui pada majlis perasmian program Hari Hidup Sihat Tanpa HIV/Aids di Dewan Seminar Perpustakaan universiti itu, baru-baru ini.

Program anjuran pelajar Fakulti Ekonomi dan Pengurusan dengan kerjasama Bahagian Hal Ehwal Pelajar (HEP) universiti itu dirasmikan oleh Presiden Yayasan Aids Malaysia (YAM), Datin Paduka Marina Mahathir.

Selain ceramah pendidikan mengenai bahaya jangkitan HIV dan Aids, pameran mengenai penyakit itu juga turut diadakan.

Dr Syed Jalaluddin berkata, kemudahan yang ada di kampus induk pada masa ini belum mencukupi untuk menampung pertambahan bilangan kemasukan pelajar berikutan minat mereka untuk memasuki universiti itu bertambah setiap tahun.

Oleh itu katanya, adalah wajar pihak UPM memikirkan semula bagi membuka kampus itu yang kini sedang digunakan sementara waktu oleh sebuah maktab perguruan di Sabah.

Menurutnya, kampus Bintulu yang akan dibuka semula itu mempunyai konsep yang berlainan sedikit berbanding sebelum ini dan ia tidak akan membebankan pihak kerajaan.

Terdahulu, Marina ketika berucap merasmikan majlis itu berkata, masalah HIV dan Aids pada masa ini berada pada tahap serius dan membimbangkan memabitkan pelbagai peringkat umur.

(END)